

四庫全書

子部

欽定四庫全書

冊府元龜卷七十三

宋 王欽若等 撰

帝王部

命相第三

唐肅宗至德元年七月即位於靈武以御史中丞裴冕
為中書侍郎同平章事

二年正月以憲部尚書李麟同平章事

二月以前憲部尚書致仕苗晉卿為左相

晉卿天寶末
為憲部尚書

屬祿山叛逆楊國忠以晉卿有時望出為陝州刺史晉卿辭疾不行因而致仕及朝廷失守衣冠流離道路多為逆黨所脅自陳希烈張均已下數十人盡赴雄陽晉卿潛逃山谷南投金州會肅宗至鳳翔手詔追晉卿赴行在所即日拜為左相國務悉以咨之

五月以諫議大夫張鎬為中書侍郎平章事

十一月以左相苗晉卿為中書侍郎平章事

十二月制曰尚書左僕射兼武部尚書平章事子儀才光三傑功格十臣克焯皇威載昌大業可司徒兼尚書左僕射司徒兼戶部尚書平章事光弼全德挺生英材

間出干城禦侮坐甲安邊可司空兼兵部尚書並平章事如故

乾元元年五月以太常少卿知禮儀事王璵為中書侍郎平章事

二年三月甲午制曰出納絲綸是稱喉舌調和鼎鼐必在鹽梅况艱難之際擇賢必資於選衆密勿之地論道固期於得人兵部侍郎呂諲間氣挺生宏才迥發訥言敏行強識博聞謀猷出三傑之先德業處五人之上久

在朝列尤推審慎復得鈞璜之慶宜膺補袞之求可同
平章事

乙未又制曰出納帝命經綸王言兆若見於非熊位必
登於仲虺行御史大夫兼京兆尹李峴朝廷碩德宗室
蓋臣中書舍人兼禮部侍郎李揆文房學府命代挺生
行戶部侍郎兼御史中丞第五琦武庫智囊應期間出
皆中和秀氣維嶽降靈可以宣暢謀猷闡宏體要庶得
道光風力名重伊臯俱當入夢之辰共舉從繩之直既

用立汝宜其弼予規可行吏部尚書揆可中書侍郎琦
可戶部侍郎並平章事

上元元年五月制曰宰輔之重陶鎔所寄用諧時望必
藉素名是以殷登左相伊尹成乎一德漢命舊臣孔光
由其再起蓋以上扶皇極下庇蒼吐永懷寅亮之美實
屬股肱之任特進守太子太傅上柱國韓國公苗晉卿
衣冠宿望廊廟公才體文雅之宏量負經通之遠識累
踐臺閣久彰名器自艱難之際協贊有勞早契風雲之

期備陳康濟之術頃以疲疴固辭樞務重違誠懇之志
爰假優崇之秩雖訂謀暫間而夢寐無忘今戎事猶虞
蒸人未乂漢將且聞於辭第留侯豈遂於停食成余社
稷之本懿爾勲庸之望固可勉行新紱載珥舊貂宜罷
輜車之禮俾膺黃閣之政可行侍中

二年二月制曰弼予之選審象是求天步未平廟謨尤
切必資明表佇以佐時畫一之材取則不遠正議大夫
前河中尹徐國公賜紫金魚袋蕭華公輔成名承家繼

業詞標麗則德蘊謨明道開雲霧之光節貫嚴凝之序
早登臺閣多識舊章再履宮坊先知至行致君望羨閱
相求能且推伊陟之賢更啟漢臣之閣還依日月佐理
陰陽俾參政於紘宸用建中於黃極可中書侍郎平章
事集賢殿崇文館大學士兼修國史

四月制曰致君惟善輔德在和必俟三台之明用增九
鼎之重彝倫所屬元氣是調乃眷公才作予良弼銀青
光祿大夫行尚書吏部侍郎裴遵慶體凝精粹理暢黃

中學與全經詞深大雅行歸於簡節固其貞公輔之望
攸先古人之風非遠累階朝序久踐天臺凡所彌綸多
為故事咸有斯在王猷是經庶弘翼善之功克濟艱難
之運登榮瑣闥參政兩闈宜輟山公之啟以光說命之
求可行黃門侍郎平章事

元年建辰月戊申詔曰天位惟艱廟謨是切委在公輔
正于四方佇昂實之能調補袞章之有闕眷求勵翼式
允僉諧朝議大夫行尚書戶部侍郎兼御史中丞上柱

國許昌縣子賜紫金魚袋充度支等使元載清明在躬
貞固幹事信必可復文而不華準繩朝端金玉王度不
有其善適觀厥成固是生靈之傑咸推宰輔之器執茲
大政叙以彝倫建中于人莫匪相爾丹青神化參議兩
闈宜書一德之篇俾協贊賡歌之美可平章事兼集賢
殿崇文館大學士脩國史餘如故

代宗寶應二年正月制曰構廣廈者審象於宏材經萬
邦者注意於良弼自非道符夢卜名冠簪裾何以允副

虛求式諧時望銀青光祿大夫京兆尹判度支充勾當
度支等使上柱國彭城縣開國伯劉晏應期生德維嶽
降賢文為君子之儒器蘊通人之量學苞前典志在於
直方詞蔚古風義存於比興自兼京劇職總均輸變而
能通弘適時之務居難若易多濟物之心頃者戎事方
殷軍賦惟錯率皆倚辦每務推誠寇難初夷皇猷咨弼
周王佐國必自於天官漢代登台咸由於亞相宜應選
衆之舉用成亮采之功可金紫光祿大夫吏部尚書平

章事勲封及度支等使並如故

廣德元年十二月以檢校吏部尚書兼宗正卿李峴為黃門侍郎平章事

二年正月以前右散騎常侍王縉為黃門侍郎太常卿杜鴻漸為兵部侍郎並平章事

大曆十二年四月制曰體國經務亮采惠疇以遂萬物之宜以刑四方之禮彌縫袞職金玉王猷平景緯於台階濟鹽梅於鼎飪必先時俊允膺旁求朝議大夫守太

常卿兼修國史賜紫金魚袋揚綰瞻學懿文崇德廣業
表微藏用適務知章朝議郎守尚書禮部侍郎集賢院
學士上柱國賜紫金魚袋常袞志業貞諒理識宏深守
正居中確乎難奪頃以戎車未戢方事仍殷永言庶政
有乖藝叙今將本俗刑教澄源振綱宣九德以阜成張
四維而翼贊洽于僉論咨爾具瞻往副審象之誠懋緝
時雍之化綰可中書侍郎平章事集賢殿崇文館大學
士修國史散官勳如故袞可門下侍郎平章事太清太

徽宮崇玄弘文館大學士散官勲賜如故

初綰為吏部侍郎典選公

平以清貞自守元載心疎忌之奏以為國子祭酒代宗知之遷為太常卿充禮儀使以觀其效用載既伏誅乃拜之綰久積公輔之望及詔出朝野相賀綰為禮部侍郎集賢院學士載之得罪令綰與劉晏李極等鞠之獄竟遂有是拜

德宗以大曆十四年五月癸亥即位閏月甲戌以新除

河南少尹崔祐甫為門下侍郎平章事崇玄館弘文館

大學士太清宮太微宮使

時常袞獨當樞務祐甫為中書舍人議喪服與袞異同堅

諍不服袞乃奏貶祐甫潮州刺史內議太重改授河南少尹時郭子儀朱泚俱以功高為相密勿之議莫得聞

知而袞假署二人之名及詔出子儀及泚皆表明其
不直有詔逐袞潮州刺史而以祐甫為相兩換其職八

月祐甫改中書侍郎集賢殿崇文館大學士脩國史平
章事如故以通州司馬司正楊炎為門下侍郎平章事
崇玄館弘文館大學士太清宮太微宮使初炎為吏部
侍郎兼史館脩撰元載為相引炎親重之載敗炎貶道
州司馬德宗初即位議用宰相崔祐甫薦炎有文學器
用帝亦自聞其名故特徵拜又以懷州刺史喬琳為御
史大夫平章事京畿觀察使

建中二年二月以門下侍郎平章事楊炎為中書侍郎
平章事脩國史以御史大夫京畿觀察使盧杞為門下
侍郎平章事

七月以前永平軍節度使張鎰為中書侍郎平章事
三年十月以吏部侍郎關播為中書侍郎平章事

四年十月帝在奉天以戶部尚書兼御史大夫荆襄江
西等道都元帥統軍長史蕭復為吏部尚書侍郎兼御
史中丞荆襄江西等道都元帥判官劉從一為刑部侍

郎京兆府尹曹參軍翰林學士姜公輔為諫議大夫並
平章事

興元元年正月以吏部侍郎盧翰為兵部侍郎平章事
貞元元年七月以劍南西川節度使張延賞為平章事
初駕幸奉天延賞陳謨供獻頗効忠力及駕至梁州倚
劍南蜀川為根本即拜延賞為中書侍郎同平章事至

是劉從一有疾乃徵延賞入輔

大歷末吐蕃寇劍南李晟領神策軍戍之及還

攜倡妓歸延賞追之晟深憾焉晟既建大功以中書令鎮鳳翔表稱宿故懼延賞之至朝廷以其功高為之免

延賞相拜

左僕射

二年正月以散騎常侍劉滋給事中崔造中書舍人齊映各守本官平章事

三年正月以左僕射張延賞平章事延賞既與李晟有隙因浙東西節度使韓滉來朝滉嘗獎遇晟又知帝欲相延賞而有阻乃因會讌說晟使釋憾遂飲極歡且使晟稱延賞於帝前於是復加平章事是月又以兵部侍郎柳渾平章事仍判門下省事又以前檢校禮部尚書

陝號觀察使李泌為中書侍郎平章事

五年二月以大理卿董晉為門下侍郎御史中丞權判
戶部侍郎竇參為中書侍郎並平章事

八年四月以尚書左丞趙憬兵部侍郎陸贄並為中
書侍郎平章事

九年五月以義成軍節度使賈耽為尚書左僕射尚書
左丞盧邁守本官並平章事

十二年十月以右諫議大夫崔損給事中趙宗儒並平

章事仍賜紫金魚袋

十四年七月以工部侍郎鄭餘慶為中書侍郎平章事
十六年九月以太常卿齊抗為中書侍郎平章事

十九年三月以淮南節度使檢校尚書左僕射平章事
杜祐為檢校司空平章事太清宮使十一月以太常卿
高郢為中書侍郎吏部侍郎鄭珣瑜為門下侍郎平章
事

順宗貞元二十一年正月丙申即位二月辛亥詔曰宰

相之職寅亮緝熙導陰陽之和贊天地之化裁成百揆
總領庶官非道契時中識通理本則何以敷暢皇極阜
安羣黎朕以眇身嗣守丕業思立人紀以承天休其代
予言允屬良弼朝議郎守吏部郎中騎都尉賜緋魚袋
韋執誼孝友忠肅自誠而明茂實本於宗師英華發於
事業久參內署動直靜專累踐中臺職脩事舉克有公
望冠於羣倫以予冲人恭默思道是用命爾納誨弼違
必能行四方之風成天下之務祇服乃職厥惟欽哉可

守尚書左丞平章事賜紫金魚袋

初執誼為翰林學士知待詔王叔文幸於

東宮傾心附之叔文亦欲自廣朋黨密與交好至是遂特用為相

七月制曰輔弼股肱之臣所與共成天功左右邦治者也朕承至尊之重居羣后之上夙興寅畏不敢康寧思所以統天人之和彰祖宗之烈以行四方之政以遂萬物之宜敷求哲人以輔台德銀青光祿大夫守太常卿充禮儀使上柱國鄭縣開國公杜黃裳弘深易簡資博厚之德朝議郎檢校左散騎常侍兼左金吾大將軍充

左街使雲騎尉賜紫金魚袋袁滋冲茂精微體誠明之
性咸以器業閎茂服在大僚祇事先朝克荷休命識達
道與文為國經固可以儀刑具僚參綜庶務寅亮天下
毗予一人罔不同心以輔乃辟黃裳可門下侍郎平章
事滋可中書侍郎平章事

憲宗永貞元年八月制曰有天下者曷嘗不選賢與能
納于輔弼用又厥辟以和羣生所以叙彝倫平憲度建
用皇極底乎雍熙者也朕祇若大訓圖任舊人疇咨庶

工用佐予理朝議大夫守尚書左丞輕車都尉賜紫金魚袋鄭餘慶全器茂學蹈中秉直易則可久而不流嘗踐禁闈亦叅袞職每盡王臣之節實彰君子之風服於大僚克有休問洎綜理會府紀綱郡司率繇舊章協于成式固可以儀刑庶尹寅亮天工可平章事

十二月制曰朝廷者天下之楨幹宰輔者王化之根源朕夙寤晨興講求為治之本思所以仰承宗廟之重俯協億兆之心諧和陰陽茂育區宇以貞百度以序九疇

佐予成功實賴良弼具瞻之地公望攸歸朝議大夫守
中書令翰林學士上柱國賜紫金魚袋鄭綱秉仁迪哲
守約居易懿以文德擇乎中庸體元和之淑姿服大雅
之明訓累登班序休有令聞羽儀周行黼藻王度洎發
揮綸翰典職禁闈以溫文雅麗之才居獻納論思之地
從容中節密勿盡規先朝任能委遇斯重恪恭夙夜縣
歷歲年誠節貫於屯夷茂勲參於顧託名書彝鼎心著
丹青朕祗膺睿圖誕受明命弘宣大典澤潤鴻猷保乂

於一人儀刑於萬國簡于朕志用選厥勞圖任舊人以
輔乃辟疇咨四嶽罔不僉同宜膺弼亮之任式懋彌綸
之績於戲為君之難在乎舉而不任為臣之患在乎知
而不言事舉其中政脩其本永綏厥位時乃之休可中
書侍郎平章事兼集賢殿大學士

元和二年正月制曰惟人代工與物施化財成者元首
輔翼者股肱况國之號令本於內史政所闕決審於黃
樞爰發四方用寧庶績必求同德資以弼予朝議郎尚

書戶部侍郎天水縣開國子賜緋魚袋武元衡挺生偉
才克振前緒蹈禮合樂謙厚端和居暗室而不欺處巖
廊而益重文能合準吏必立程再司石室之圖遂踐春
華之署故事可舉嘉猷日新爰委地征實惟邦本勤於
小物弘以大綱一心不移於吐茹衆務必歸於領會鬱
此時望稱為名臣朕祇奉鴻休懼于負荷居則神明之
隕位當億兆之尊嘗恐明不燭幽慮不及遠一物未獲
萬方在予書不云乎臣作朕股肱耳目是用命爾處茲

弼諧爾其慎於將命勉於規誨必思袞闕無或面從直
哉惟清副我明命可朝議大夫守門下侍郎平章事賜

紫金魚袋

憲宗為太子時知元衡進退
守正及用為宰相甚禮信之

又制曰昔周宣王思弘文武之道則以申甫代天工漢
宣帝思振祖宗之風則以邴魏執邦柄是以克紹前烈
俱稱中興朕以眇身託于人上亦思所以繼列聖之緒
致太階之平懷柔四夷親附百姓將成莫大之業遂獲
非常之才授之鈞衡俾作舟楫銀青光祿大夫行中書

舍人翰林學士上柱國李吉甫符彩外發清明內融體
仁而溫抱義而俊識洞精臍知皇王政理之源學該古
今窮天人相與之際自擢于綸閣列在禁闈鼓二變之
文潤色王度總五材之用參贊廟謨化俗思邁於成康
致君願及於堯舜當注意之所向每罄心而俾陳深中
不回獨立無懼經綸嘗見其道遠激切多至於涕零王
綱以張蜀寇斯殄左右密勿實由嘉言降神而生輔朕
為理調三光以序六氣遂物性而熙帝猷是為中樞思

我大本命爾俞往其惟勗哉於戲宰輔之任安危所繫
百辟為憲萬邦所瞻與其明察以為公不若嚴重而有
制與其將順於甚美不若拯救於纖違審涇渭以序人
倫謹繩墨以示天下交泰之運其在斯乎敬聽朕言以
踐乃職可守中書侍郎平章事

三年九月以山南東道節度使檢校尚書左僕射同平

章事燕國公于頔為守司空平章事

初頔專有漢南之地不奉詔旨擅總

兵據南陽德宗為之旰食及憲宗即位威肅四方頔稍戒懼至是來朝故有是命因以裴均代為節度使

是月以戶部侍郎裴均為中書侍郎平章事

初均罷翰
林學士憲

宗知均好直信任彌厚因李
吉甫出鎮淮南遂以均為相

四年二月制曰皇王理本繫於輔弼內以熙庶績登百
工外以撫四夷式羣后三五已降崇替繇之朕祇荷丕
圖思底于道夙夜惟厲登延俊賢若涉大川俾作舟楫
朝散大夫守給事中上柱國李藩天鍾萃美氣稟清英
信任言前行為人表蘊經邦之識度發自明誠見理道
之根本鬱為公器學深旨奧文以忠貞大玉斯寶于東

序朱紘可薦於清廟廣則難挹剛則有容處衆無溷其
風標存簡較推其名節累登華署克贊彌綸擢授左丞
專聞駁議永為股肱之任翼亮是資必求其人豈限嘗
次黃樞選重僉曰宜之爰舉朝章式副公望於戲爾惟
率正邪罔不懲惟匪躬直誠可以事上惟秉鈞平施可
以致和毗予一人允理三事懋乃攸績永孚於休可朝
議大夫守門下侍郎平章事賜紫金魚袋

五年九月制曰夫宰相之任上以代天工輔佐之宜下

以立人極爰得忠正方膺股肱正議大夫守太常卿上
柱國襄武縣開國侯賜紫金魚袋權德輿器度端實智
識通敏學成師法文為國華素履嘗踐於貞方黃中允
合於易簡自出入清列茂著嘉猷名利無屑於中懷風
雨不易其常性驥驟之質嘗識於遠途鸞鳳之姿宜巢
於阿閣期於致理推之至公寵以春卿掌我樞務輔天
地之德俾化及清寧道陰陽之和使物靡疵癘予違汝
弼言無面從君可臣否事已心許用佇弘美式副虛懷

可守禮部尚書平章事散官勲封賜如故

六年正月制曰輔弼之重邦家所屬寄深垣翰則外撫
諸侯望切股肱則入熙庶績迭居其任厥惟舊哉前淮
南節度副大使知節度事管内支度營田觀察處置等
使金紫光祿大夫檢校兵部尚書兼中書侍郎同中書
門下平章事揚州大都督府長史上柱國趙國公食邑
三千戶李吉甫弘經遠之才研極深之慮脫落細故洞
開中懷文稽典纂學升堂室洎司我密命言屢表於獨

明參予袞職道每彰於孤直貢其誠節竭以公忠陸典
載張夔倫攸序輔予不逮懷之豈忘曩以江淮大都吳
楚鎮歲屬艱食人多愁聲是假全才用康疲俗下流
乎水利不憚乎勞心故蠹以長塘渚其天澤變鵠鹵為
稻梁之壤致蒸黎有衣食之原吏守成規人無遷志庶
富之教既宣於封內輔相之宜俾及於天下顧茲重務
屬於良臣去其外職之繁專以中樞之任至於別館良
史之衰貶內殿集賢之清秘爰舉舊典式洽新恩無曠

厥官往踐乃位可中書侍郎平章事兼集賢殿大學士
兼脩國史

十二月制曰司重柄者允屬於長材熙大猷者固資於
端士朕纘承鴻緒撫有萬方夙夜祇勤懼遠於道故每
注意宰輔勞懷夢想誠以得失之效邦家所繫疇若僉
論簡予深衷必惟其人是舉成命朝議郎守尚書戶部
侍郎驍騎尉賜勳金魚袋李絳質秀珪玉文含采章抱
器挺生居貞特立有史魚秉直之操勵山甫匪懈之誠

忠孝兩全學識兼茂清標可以範雅俗正氣可以肅羣
倫頃自周行俾參密命動必以義知無不為審審懷經
濟之心孜孜陳遠大之畧言無隱避名則靜專貫于始
終其道一致地卿之貳爰委典司理財先示于簡庶利
物每懲于聚斂經道立制器用彌光臺閣之間鬱有公
望是宜權衡百度宰理庶工允副具瞻掌我庶務於戲
予欲驅人俗以躋富壽感人心而致和平爾尚脩明憲
章宣布德澤必廣大其志無皦察為公任之以職無忘

陳平之言苟便于人勿憚蕭何之請敬茲寵擢其懋哉可朝議大夫守中書侍郎平章事

八年二月制曰邦國興理將相是咨選衆而舉思賢俾又故有台臣外撫宣力以靖於四方袞職迭居懋功復凝於庶績允茲崇踐爰屬上才前劍南四川節度副大使知節度事管内支度營田觀察處置統押近界諸蠻及西川八國雲南安撫等使銀青光祿大夫檢校吏部尚書兼門下侍郎同中書門下平章事成都尹上柱國

臨淮郡開國公食邑二千戶武元衡粹厚端莊簡易恒
一有成名之道以致用有宏茂之略以佐時直方自得
於性術操尚不愆於風雨加以懿文合雅聚學承師通
禮樂刑政之源達古今治變之要歷登華貫休問穆然
泊處鈞衡中立不倚致君思堯舜之盛脩職以邴魏為
宗翼戴之勤夙夜彌亮藝倫攸叙鼎飪載和益部大藩
比伏兼濟而能布宣威惠撫控蠻髦縣道輯寧疲黎安
息推心而士皆率附正己而人自嚮方臨之累年理有

異等朕以出納王命緝熙帝圖總庶官之職業為百度之扃鍵惟此重任屬於黃扉分憂遂輟於殿邦具瞻再歸于碩望爾尚行之以中正煦之以和平毗予一人膏潤天下祇服禮命無替令猷可守門下侍郎平章事兼崇玄館大學士充太清宮使

九年六月制曰虞以為盛猶咨五臣殷之用興亦賴三后朕勵精恭己十載于茲嘗以國鈞委之公輔務熙庶績敢怠旁求思欲左右有人在廣股肱之任歷選列辟

泊于草澤與獲能賢俎弘正道今茲所命允屬至懷河
中晉絳慈隰等州節度度支營田觀察處置等使正議
大夫檢校禮部尚書兼河中尹御史大夫上柱國高平
縣開國子食邑五百戶賜紫金魚袋張弘靖德稟精微
器舍冲用溫恭諒實明允克誠素推君子之風雅有大
臣之體蘊積稽古之學發揮經緯之文嘗司朕言動協
謨訓歷踐清貫具揚淑聲爰統方州載膺節制奉法遵
道勤公忘私人無不懷績用丕茂予欲正百工之理開

太平之階若臨巨川以重舟楫是用命爾參列中台每
念臣隣之規以貞棟崇之吉少翁積慶嗣德漢廷文子
勤身繼主晉室爾惟朝夕納誨以翊朕躬是資袞職之
勤式重緇衣之美仍帥司寇之屬俾靖臯陶之刑懋宣
厥繇往踐於位可刑部尚書平章事散官勲封如故

又制曰弼成大化參叙彝倫克光元首之明斯其股肱
之任所以不自暇逸務求賢能式重舟楫之才以弘經
濟之道疇若予采僉諧乃公中大夫守尚書左丞上輕

車都尉賜敕金魚袋韋貫之清明在躬禮樂之器蘊珪璋特達之德茂廉正博雅之觀靜而知微動必有守凡踐列位備聞嘉猷當官而行臨事而斷道可正于風俗望彌積於朝倫是宜和靜陰陽紀綱邦國命作心膂列于台階夫能慮四方揆百事愛利萬物辨論羣材公以忘私時乃之職而况圖靖藩服繫在廟謀爾惟順下以訓人奉上以宣力因衆功而致用熙衆志以為心朝夕獻可否之誠經綸底文武之績祗膺厥服勿懈于時可

守尚書左丞平章事散官勲賜如故

十年六月制曰輔相之任重作予股肱經濟之才難在
人耳目苟非慮研物表識洞事先則何以出納中樞平
章大政詢於時論僉曰汝諧朝議郎守御史中丞兼尚
書刑部侍郎飛騎尉賜紫金魚袋裴度勁正循道清明
秉藝文融菁華行茂枝葉居然廊廟之器出於領袖之
門西掖司言南臺執憲嘗陳明略屢告嘉猷實宣力以
徇公能外身而憂國霜雪無改風雷有恒朕欲旋觀其

能明試於事俾歷戎閫載馳使軒王澤渙汗以遐宣軍
情密勿而上達將議抽擢因懼震驚崇道德之藩籬士
有致命資忠信之甲冑兵無容刃人具瞻爾天方賚予
昆命于龜爰立作相爾其展四體堅一心廣其道以用
賢厚其風而易俗五兵未戢爾惟保定武功百姓未康
爾惟勤卹人隱臨事必斷當官而行濟台階以至平補
袞職之有闕光膺慎選其戒之哉可朝議大夫守中書
侍郎平章事

度知制誥時田弘正初以魏博順命度宣
慰弘正軍中及見境內百姓布揚德澤上

下感悅還奉稱旨度勁辨能言軍國情體通達物情尤尚感激繇是將帥多悅自淮西行營還帝蒞聽信猶以武元衡輩在尚未用度元衡遇害便以大計屬度度初以瘡卧二十餘日詔以衛兵宿第中使日至未拜相先一日遣使詔度不用到宣政參暇便來延英候對及見念問周恣明日又召使受制命時外集天下兵而內有大恐及度任政人情始繫以安危

十一年二月制曰朕觀古先哲王興化致理未嘗不選建良弼熙寧庶政俾之敷陳大猷左右乃辟者也朝議郎守中書舍人權知禮部貢舉輕車都尉賜緋魚袋李逢吉疏通而守於經制質厚而輔以文華貞恒自居和

易待物體賢人之志業茂端士之風規履歷班行發揮
事任厥心匪懈所至有聲自彌綸粉闥駁正瑣闥且司
言於左掖當納訓於東儲誠明一貫聞望旁洽伴司貢
士亦著嘉聞方今外興不得已之師內有不獲安之俗
嘗忘食於將旰每求衣於未明冀清原野之誅用止干
戈之役登爾輔弼代予憂勤爾宜敷至化於吾人告嘉
猷於厥后銷弭氛祲導迎和平事有不舉其中政或未
孚於下爾惟啟沃無乃面從可朝議大夫守門下侍郎

平章事賜紫金魚袋

時逢吉知禮部貢舉既策試未勝第其名而有是命禮部尚書王播

署而出之

是年十二月制曰上宰參職所以法三台之耀中樞議
政在乎遂萬物之宜朕獲承鴻休思建皇極翼沃心而
納誨嘗注意以求賢通議大夫尚書工部侍郎知制誥
翰林學士上柱國清源縣開國男食邑三百戶賜紫金
魚袋王涯動直靜專踐方居易挺歲寒之勁質抱夙夜
之端誠言皆守中慮每經遠屬者禁垣揮翰五字日宣

選部持衡九流風動薦居肘腋之地歷試股肱之才進
嘗伏於青蒲出不洩其溫樹半融得大臣之節毛玠有
古人之風詢廟筭以生知論兵鈴而暗合方今我車尚
駕郊壘猶多必候清明以消氛沴是用付以機密陟于
崇高爾其發號令以靖其四方陳便宜以寬于百姓行
臺閣之故事弘朝廷之大體秉德以立徇公不回予一
人垂拱而理敬聽成命懋哉戒哉可守中書侍郎平章
事

十二年七月制曰成萬方之化通天下之志緝熙帝載
昭暢玄猷在于股肱之臣共凝治本旁求時彥以叙彝
倫朝散大夫守尚書戶部侍郎上護軍賜紫金魚袋崔
羣粹密由道端莊保和本清明之上才體博厚之重德
學貫通儒之業詞含大雅之風居敬有恒循性能斷自
承密命職參內廷高文煥發于綸言敏識詳達于國典
伏奏無撓直躬不回勤勞八年始終一致春闈取士必
後其浮華地官理財能制於輕重儉以約己忠惟事君

才適而用深望積而實著風猷已洽于人聽倚屬方注
于朕心乃膺審象之誠以副具瞻之望况姦兇叛逆尚
駕我車未明求衣思戢干櫓爾宜酌古今之要舉刑政
之中艱厥位以代天工陳其謨以明皇極敬茲重命往
踐台階可守中書侍郎平章事

十月制以淮南節度副大使知節度事管内度支營田
觀察處置等使銀青光祿大夫檢校尚書右僕射兼揚
州大都督府長史御史大夫江夏縣開國侯李鄴為門

下侍郎同平章事

十三年三月詔曰致理之道王者猶盡其心弼成之功
輔臣所以宣力皇極是建蒼生乃安敷求實難倚任斯
重將付大政必惟僉諧正議大夫守御史大夫上柱國
成紀縣開國侯食邑一千戶賜紫金魚袋李夷簡才稱
通明性本嚴重守以正直傳之文華羽儀朝端晃耀宗
籍早司邦憲爰總地征糾逃無間于避強經費克均其
定制中立不撓孤標出倫聳善激貪法行令肅自鎮漢

上洎臨蜀川儉德載彰清規一貫山嶽比厚風雷有恒
勵貞俊以理心竭忠勞而奉上人望汲黯印歸趙堯俾
之持綱萬目皆舉固可以參綜庶務允釐百工變和陰
陽宣發號令是申明命陟于台階於戲誠積爾躬夢協
朕志虛已將求其弘濟鯁言罔懼于咈違道必舉中位
無苟曠膺此寵擢敬哉戒哉可守門下侍郎平章事
十四年七月制曰贊天工而成光濟協帝力以致升平
非中和稟氣不能符變諧之道非誠明在躬何以庸弼

亮之位况今積妖已殄而邊鄙猶虞大化方行而里閭未泰時欲舉百度甄羣材外經四夷內輯諸夏納之壽域被以仁風代予之勤其孰克任眷求斯得是用命之和陽三城懷州節度使朝議郎使持節懷州諸軍事守懷州刺史兼御史大夫賜紫金魚袋令狐楚根於粹厚著以端明表山立之莊容洞淵停之精識文高雄富學茂該通自頃揮翰掖垣持橐禁署常延造膝屢竭啟心發言必誠臨事無惑藹是公望居然國楨及剖符近郊

兼暢牧人之術杖節分閫尤深馭衆之才謂器適中外
效宣文武宜展舟楫之用式登鼎鉉之司管于中樞持
我大柄於戲輔翼之任人臣極崇未至而重議有歸既
處而其名罕副萬務攸託朕何賴焉爾其敬聽此言深
思其道行致君之志始終勿渝以報國為期夙夜益勵
無俾厥后有慙知臣可朝議大夫守中書侍郎平章事
八月制宣武節度守司徒兼侍中韓弘可守司徒兼中
書令以弘堅辭戎鎮故也

穆宗元和十五年正月即位是日制曰廊廟之任萬邦
所瞻調一氣之和序五材之用出納王命發揮帝猷簡
求賢能弘我理本朝議郎守御史中丞飛騎尉襲徐國
公賜緋魚袋蕭俛識通化元道契休運有戴君峻節之
志秉見義匪躬之誠代襲公台族高軒冕學冠古今之
要詞深雅誥之宗嘗事先朝職居宥密奏議無撓忠勞
益彰洎執憲南臺肅清朝序休望彌洽直聲日聞朕方
臨萬邦思致于理若涉大水浩無津涯將務簡以安人

欲息兵而論道審象而授其代予勤爾其端志絕私去
末崇本叙禮樂于邦國正風教于人倫舉其鈞衡明示
天下無俾一德專美于殷爾其敬之奉我成命可朝散
大夫守中書侍郎平章事仍賜紫金魚袋

又制曰賚於良弼期有濟人必惟才臣乃克成務况端
潔剛毅可以肅具寮敏裕周通可以熙庶績外無飾虛
之禮中有效實之誠簡于朕心乃命以位朝散大夫中
書舍人翰林學士武騎尉賜紫金魚袋段文昌門襲忠

勲器苞才傑廣而不雜峻而能溫脩詞每掇其菁華所
尚者風格發言必探于指要所貴者變通識古今理亂
之源知遐邇利病之本自掌文翰苑列籍金門出入五
年恭勤一致屬朕初承寶命屢進嘉猷諒我憂惕之懷
竭其公忠之志昨因召見更有詢咨造膝之言注意斯
得必能奉將命之大任申獻替于虛襟爰升鼎鉉之司
冀展舟楫之用於戲萬務之始九有所瞻將致治平可
不競勵爾其夙夜惟慮弼輔朕躬使四夷咸賓百度惟

理阜俗必蘇於瘁瘵審官無爵其賢能理當詳於幾深
道當固于久大惟自誠可以化物惟先己可以律人勉
哉戒哉無忝我首命之重可守中書侍郎平章事

八月制曰夫宰相者上調元化以亮天工下熙庶績以
輔君德未有心不直而能協於道迹不正而能致其君
必求斯人乃命以位朝議郎守御史中丞武騎尉賜紫
金魚袋崔植氣志凝遠風標粹清率性而行潔己以進
周歷臺閣藹然聲猷頃者姦臣未降利權方擅情惟刻

下其事將行而植獨能橫抗申以駁議朕每嘉重不忘
于懷自膺寶圖俾掌邦憲又能悉心秉執造膝敷陳歸
于無私多所弘益爰擢作相冀能弼予於戲惟爾先太
傅當德宗始初清明首居相位克固直道至于今稱之
爾其嗣乃家法無廢朕命可朝散大夫守中書侍郎平
章事又制以中書侍郎平章事蕭俛為門下侍郎平章
事

九月戊午制曰懷大中者必誠其茂勲建茂勲者必極

其高秩朕虔守鴻業靜思化源姑欲表忠節以勵為臣
舉勲籍以勸立志况乎位崇上相遇重先朝首陳宏圖
躬率羣帥克定妖孽坐清寰瀛得不再申袞崇昭示倚
注河東節度觀察處置等使金紫光祿大夫檢校尚書
左僕射兼門下侍郎同中書門下平章事大原尹北都
留守上柱國晉國公食邑三千戶裴度材膺啓運道協
功偕一心盡忠百志歸正雖量包弘曠靡所不容而節
抱孤貞凜然難奪所以特承恩顧專委謀猷堅持其誠

獨立不懼在昔有晉厥功平吳惟茂先決策於中惟元
凱整旅于外兼能竝用度寔有之許國忘身勤亦至矣
自居重任出入六年及鎮太原聲績一貫朕永懷丕烈
乃睠舊臣將副深衷式加新命惟正三公之位在乎九
土之司論道再光總戎益重毗我王室永孚于休可守
司空依前兼門下侍郎平章事

長慶元年二月制曰先朝正姦邪之罪刑海內之心既
承大勲付朕鴻業思欲述事繼志偃武脩文揚其耿光

屬在髦傑朝散大夫守尚書戶部侍郎知制誥翰林學士上柱國建安縣開國男杜元穎識稟人秀才為國華氣縝密以含章言清明而體要廉方不雜峻直無徒動朗鑒而心運陽秋鼓雄詞而氣幹河嶽爰以精粹列于內庭通賈生治亂之言達管氏刑政之本未至高位蔚為名臣間者妖孽相挺紛亂南北朝夕機命迅如風霆而翰動若飛神無滯用思戢必盡其心力避榮常執其謙光况處奉綴衣導揚訓命雅仗忠貞之志實有安定

之功本于忘身愛我以懷感激無隱切劘盡規既納誨
于三篇亦陳戒於六事朕嘗委以大政詢其遠猷研幾
必精應變嘗理布舊章于河朔推大信于昆夷無所不
諧實由密贊全器焜耀淑聲流聞升于台階允是瞻望
於戲昔爾先正為唐宰衡惟爾傳臧孫有後之慶秉邵
公是似之德宜纂舊服協于至公乃思貽厥之謀率攸
行之道扼制羣動衡平衆流俾人不迷時乃之績乃守
尚書戶部侍郎平章事散官勲並如故

十月制曰昔蕭何用新造之漢而能調發子弟完補敗
亡使關東糧餉不絕者以其盡得秦之圖籍而用知其
衆寡也我國家承十一聖之區寓億兆人之生齒而曰
不能足食足兵朕甚惜焉則非惟調陰陽撫夷夏者不
欲侵泉貨之任而主會計較盈虛者不得參邦國之重
乎予將兼之允在能者諸道鹽鐵轉運等使大中大夫
守刑部尚書騎都尉大原縣開國男賜紫金魚袋王播
在德宗時以對詔入仕踐更臺閣由御史中丞尹京兆

掌縣官鹽鐵為春曹尚書乃長已髻以控蠻蛋盡稱厥
職達于予聞洎詔徵還便殿與語得所未得聞吾未聞
昭然發蒙幾至前席重委操剡鉞刃益精國有羨財而
人不加賦東師在野物力蕭然不有主張孰能戡濟是
用命爾作相仍以舊務嬰之爾其西備戎羗東定燕冀
內實九府外豐萬人百度羣倫罔不在爾於戲典謀訓
誥行之維艱邪正是非知之孔易予唯以不敏不明茲
用爾為股肱耳目又安能一二戒誨垂之空言爾其自

勵于爾心無令觀聽者論爾于鄉校可守中書侍郎平章事依前充鹽鐵轉運等使

二年二月制曰朕聞御大器者登俊賢以為輔弼敷大化者擢公忠以施政教故能成天下之務達天下之精俾三光宣明百度貞正我之倚注方得其人天寶賴予允副僉望尚書工部侍郎元稹珪璋茂器鸞鳳貞姿文涵六義之微學探百氏之奧剛而有斷忠不近名勁氣常勵於風霜敏識頗知於今古自擢居朝序休問再揚

不自飾以取容不苟安而回慮處直忘屈在屯若夷卓
然懷陶鑄之心豁爾見江湖之量間者司文禁署主朕
樞機每因事以立言累披誠而獻計心惟體國義乃忘
身深陳濟物之才雅見經邦之志朕思弘理本用治生
靈式資康濟之材以暢和平之化於戲爾率于正則不
正者知慎爾進于善則不善者必悛惟直道可以事君
惟至公可以格物是茲數德毗予一人永孚于休以底
於道可平章事

又制曰涉大川者操巨艦不畏於洪波搆廣履者揭雄材乃安於棟宇朕祇奉神器尊臨萬邦思弼諧輔相之臣致易簡雍熙之業爰擇舊德委之樞衡冀弘嘉猷以闡玄化淮南節度副大使知節度事管內營田觀察等使光祿大夫守司徒同中書門下平章事兼揚州大都督府長史上柱國晉國公食邑三千戶裴度氣稟宏廓材優康濟達識高議兼明不渝儀刑可以光巖廊度量可以方海嶽操握政柄弛張化權彞倫典謨合若符契

昔我先聖以武畧深計中樞密勿委之廟堂四海咸理
朕仄席虛已勞懷宵旰禮命元老聞斯格言衷懷洞然
雲霧皆豁是用輟撫淮南舉之台袞換其戎律列自黃
扉秩崇上公望積師長寄爾以周召待爾以蕭曹任爾
以埏埴授爾以鈞衡於戲衽席樽俎之內堂室牖戶之
間無俟規臨可以觀察違爾宴息期爾折衝庶乎陰陽
協和品物昭泰惟言是納爾舉必從使益稷臯陶爾無
慙德垂衣南面我獲任賢無易斯言式遵明命可守司

空兼門下侍郎平章事

度拜淮南未行有徐方之變兼河北諸軍進退未一言事者亦

多以度出非宜及詔下人人望度尅日定理

六月制曰朕聞天地洪鑪致之者橐籥帝王大業成之者股肱故堯舜垂衣禹湯恭己弘道任德為予輔臣則八表乂寧萬邦咸理故伊尹之舉臯陶之升庶績其凝不仁自遠正議大夫守兵部尚書輕車都尉賜紫金魚袋李逢吉大方比量中正持心真玉無瑕堅金在礪峻節而高山可仰推誠而止水可觀剛柔所持吐茹無易

往以青宮齒學道我典墳儀式孚蘭莖馨茂洎升台
席翊奉先朝訏謨密聞獻替潛達外順昭德中升至言
溫恭聿脩始終一貫朕嗣守丕業思得賢良將俟和羹
期於舊老易之襄漢居以南宮每詢嘉言啓沃惟久今
授之相印委以樞衡代天之工爾在專任於戲發號施
令選賢與能申于百辟之上行於四海之內朝無黨比
人絕澆浮白黑燦然淄澠不溷使巖廊重位揚我清風
弘宣大猷以暢王度可守門下侍郎平章事

三年三月以戶部侍郎牛僧孺平章事

敬宗長慶四年正月即位制曰理多務者必資經遠之
能總衆材者實在選舊而任疇咨與議參詢廟廷果獲
誠臣副予虛位正議大夫尚書吏部侍郎上柱國涇源
縣開國男食邑三百戶賜紫金魚袋李程文含鍾律器
挺珪璋行已蹈常與物無忤早以詞翰密侍帷幄開弘
顧問發揮訓謦周旋臺閣閱歷中外秀造稱其得俊衡
鏡表於無私卑牧難踰深藏不耀朕荷負重構祗守大

業自顧寡昧動遵先規委成台司不操將斷自居無悔
之地以馳至正之途而元輔勇於進類常思任人與其
自仕不若用賢命之僉求以名列上而程為舉首是必
至公爾宜謹繩墨以示諸侯平好惡以待多士秉彛倫
以澄躁競覈名實以鎮浮虛協睦乃僚無替朕命爰因
銓品之鑒載佇烹飪之功可平章事

又制曰昔周宣王漢宣帝思弘祖業克紹先構用申甫
邠魏為相然後周道重熙漢德累洽朕以冲眇託于億

兆之上緬惟文祖玄宗之理若涉大水浩無津涯詢於
巖廊俾舉髦碩果得才傑副予虛求必惟其人乃命以
位朝議大夫守尚書戶部侍郎兼御史大夫判度支上
柱國賜紫金魚袋竇易直端厚靜慤直方簡廉氣深而
和識敏而達每去華而務實不為善以近名早以器能
揚歷中外司憲著紀綱之積廉俗垂惻隱之仁較于天
官掌我邦計底慎材貨均節委輸賙給不窮贍濟皆足
國有大柄屬於全才况朕新臨寶圖萬物資始審像而

授其代予言爾尚弼予一人用底于道且漢以丞相調
兵食周以冢宰質歲成我國家雜用古制以重其事也
爾往欽哉無忝我成命可平章事判度支

寶曆二年二月丁未制曰朕周觀帝王之道春秋富則
倚附舊老享歷久則簡擢俊髦故我玄宗開元之始任
宋璟姚元崇之輩以調陰陽東封之後乃用李元紘張
九齡之儔以承法度洎予恭守大位于今三年巖廟藩
封建于左右前後皆皇祖聖父之人固有易置况勲望

冠代器業絕倫副予揣論贊此休運凡百有位敬而聽之山南西道節度觀察處置等使光祿大夫守中書門下平章事兼興元尹上柱國晉國公裴度以忘家抵患協于憲宗以匪躬不撓佐於先帝十拜相詔四登師垣接士猶布衣之心悲時急戀闕之思價重乎內外名殷乎華夷藉是風猷俾參大柄且滿吾志亦用僉聞於戲君臣合符不可多得千載一遇猶為比肩爾宜援古以自強垂後以居重文終之畫一平陽之并容諸葛持衡


之公相如引車之意率彼四子足為成人服茲昌言往
踐乃位可守司空平章事是月丙寅以中書侍郎平章
事李程攝中書令受冊正衙宣制

文宗寶曆二年十二月即位庚戌制曰構大厦者實先
梁棟之材濟巨川者必資舟楫之用朕越自藩邸庸期
大統夙夜震兢若蹈淵谷况齊思毗又艱步甫寧上奉
山陵七月之期內停訐謨庶政之始俾我眇末寘之極
樞將恢興運之功俾協具瞻之望博閱名實獲茲忠賢

實帝賚予其誰與讓正議大夫行尚書兵部侍郎知制誥充翰林學士上柱國賜紫金魚袋韋處厚體道為徒見義為勇居易以行古至和而不流水霜挺松栢之姿貞白秉珪璋之德文揮風雅學該儒玄器洽而保之以謙識明而用之以晦選自經藝侍于穆宗擢司密命實贊先帝壹彼直操彰其遠猷臨危勵難奪之誠推忠備弘益之道屬者變生宮掖謀俟經綸首參底定之功載竭忠貞之效雪憤橫涕披肝貢詞約我以禹湯罪己之

勤博我以古人致理之要聽必感動悉其條陳洪纖靡
差夢卜斯協必能式是中外啓茲雍熙俾予冲人克遂
垂拱是用擢升鼎鉉式亮帝圖庶無愧於知人且用光
於斯道於戲前哲有言良臣惟聖處殷憂舉衆之仕
荷濟理沃心之期注四方傾動之勤在百辟具瞻之任
可中書侍郎同中書門下平章事

太和元年六月癸巳以淮南節度副大使王播為尚書
左僕射同中書門下平章事



冊府元龜卷七十三

欽定四庫全書

子部

冊府元龜卷七十六

四至

詳校官中書臣瞿照

員外郎臣牛稔文覆勘

總校官庶吉士臣何思鈞

校對官中書臣徐步雲

謄錄監生臣官懋斌

欽定四庫全書

冊府元龜卷七十四

宋 王欽若等 撰

帝王部

命相第四

唐文宗太和二年十二月制曰綏緝萬邦實資乎元首
弼成庶績允屬於股肱將以導宣化源崇固理本立我
皇極贊於時雍故任賢著於禹謀納誨彰於說命眷求
懿德斯惟僉諧中散大夫守尚書兵部侍郎知制誥充

翰林學士上輕車都尉賜紫金魚袋路隨性稟中庸氣
含大雅身無擇行學不為人敏識周邁宏才恢博挺然
仁者之勇蔚為君子之儒祇事穆宗侍經內殿敷堯舜
之大典暢周孔之遺風雅言玉音與義冰釋潤色王度
發揮聖聰出入禁闥踐履華貫位彌高而惟謹任愈重
而滋恭逮及先朝復叅密命雍容侍從早以賦於甘泉
左右便蕃未嘗言及溫樹周旋九載始終一心直道匪
躬謹言盈耳每訪謨猷之指用陳裨益之誠出不忘於

詭辭退必聞於削藁器可經國忠能致君跡其公正之
方用叶毗倚之任於戲干戈未息爾其弘智用以靜寇
攘役戍尚勤爾其宣柔服以懷戎狄均國賦以安阜百
姓振朝綱以綜覈羣才退無後言動必慮善貞爾百度
弼予一人寵以峻階委之極務往踐厥位時乃之休可
正議大夫守中書侍郎平章事

四年正月詔曰昔漢宣帝用魏丙以成中興之業我玄
宗任姚宋以致開元之理其術無他得賢而已朕猥居

大寶首涉五年宵旰靡遑憂勤至切將倚任於國柄宜
登進於人傑俾其復運樞極載清化源斷自朕懷允膺
僉屬武昌軍節度鄂岳蘄安黃申等州觀察處置等使
金紫光祿大夫檢校吏部尚書同中書門下平章事使
持節鄂州諸軍事鄂州刺史上柱國奇章郡開國公牛
僧孺氣含元精體包大雅識用夷密襟靈沉粹窮聖賢
旨與之學鋪邦國經緯之文蔚為名臣秀出羣萃長慶
御歷登賢濟人廊廟有光臣工得職代天協理時乃之

休先朝與能罷出征鎮吐俗丕變師旅太和宣力事君
時乃之蹟朕飽聞罷業虛佇風儀會曹參之促裝喜韓
侯之來覲便殿延對前席與言通古今理亂之源知教
化損益之務其應如嚮不知所然是宜卿長夏官平章
大政康濟四海毗予一人於戲君不能自為堯舜必待
其臣以致之臣不能自為伊臯必待其君而任之致則
期於盡力任固在於聳善然後上下交泰君臣相須爾
其使百官得其人萬事得其序邪正之路必判清濁之

流必分金堅一心柅制羣類無重否德予皆仰成可兵部尚書平章事

七月詔曰出納大命宰司元化調四氣以統和天人貞百度以鎮安夷夏必資髦傑用委鈞衡朕嗣守丕圖思弘至理萬物之重屬於台臣仄席勤求冀禋不迨况素效久彰於密勿精才已得於詢謨擢自內庭授以袞職爰立佐佑斯為得人朝議郎守尚書右丞上柱國賜紫金魚袋宋申錫岳降全德天資正性處約居厚蹈中秉

藝文每掇其菁華學必探其玄蹟夙播休問拔乎羣倫
自選入周行參我內署奉職恭肅率心坦夷蘊冲用以
究國經鋪訓詞以潤王度密贊彌久弘益滋多朕累因
暇日召於別殿訪以大政觀其立誠而曾襟洞開肝膈
無隱識精詞直實契虛求固可以掖持化權參決理本
是用升於鼎鉉付以樞機繇仙闈總轄之司當宰輔具
瞻之地熙此庶績弼予一人於戲元首以司牧萬方股
肱以協贊皇極上推公以馭下臣竭忠以戴君際會交

感而臻大化歷視前古何莫繇斯予方率是道以臨兆人爾宜悉乃心以成一德敬戒厥位永孚于休可正議大夫行尚書右丞平章事

七年二月制曰弼亮鈞衡宣翼統紀明景化以凝庶績啓嘉謨以建大中爰求國楨以輔台德銀青光祿大夫守兵部尚書上柱國贊皇縣開國伯食邑七百戶李德裕元精孕靈和氣毓德堅直成性清明保躬貞規澹夷敏識冲遠學宗九流之奧文師六義之宗令聞夙彰僉

諧允屬自提綱栢署掌誥禁闈釐紀律詳平之司竭訐
謨密勿之節洎察廉浙右總鎮滑臺再委旌旄輯安印
蜀克有殊政咸懷去思諒惟全才茂此聲績朕以疇庸
之典彝訓所先入遷司馬之崇彌積濟川之望是宜納
誨朝夕擢居股肱勉弘伊呂之勲以嗣良平之美業傳
相印門襲戎旃紹絲綸內職之榮繼鼎鉉中樞之重珪
紱之盛恩輝罕儔爾宜罄乃忠貞副我毗倚無忝承命
服茲寵光可本官平章事

七月制曰居端揆之任再踐國鈞稽筭權之功兼司邦計爰崇舊德以緝新規簡自朕心用久僉屬金紫光祿大夫守尚書右僕射充諸道鹽鐵轉運等使上柱國代郡開國公食邑二千戶王涯元精降靈體道秉哲恬智成性清貞保躬文行可以經邦風操可以鎮俗以明用晦處貴滋恭憲宗以禁署竭忠擢登輔弼先帝以台階宿望寵授旌旃陰陽變調藩服寧謐機務允理政經交脩洎綜銓九流式序百禮提旌紀律統明貨泉法必便

人事先體國聲績茂暢洽於羣謚朕以邊鄙防微猶存
兵戍資儲之備供億尚繁頃者支費轉輸任分兩使量
入制用誠患多門俾足食以豐財在省員而簡務是用
合此二柄委於元僚正茲通變之初藉我股肱之重勉
思率職無或憚煩敬戒乃心欽承休命可本官平章事
充度支及諸道鹽鐵轉運使

八年九月壬戌詔追興元節度使李宗閔赴闕十月庚
寅詔曰職代天工望歸人傑必資求舊允副僉諧山南

西道節度管內觀察處置等使兼興元尹銀青光祿大
夫檢校禮部尚書同中書門下平章事上柱國襄武縣
開國侯食邑一千戶李宗閔巖廊正人宗室全德才惟
不器道實生知粹茂體陰陽之和周旋成禮樂之用外
弘疎朗中實誠明白璧凝溫朱絲秉直文窮三變學洞
九流早以忠規契于審象雅有玄畧能宣大猷底寧戎
蠻協贊郊祀見可而進知難靡回啓心嘗罄其嘉謀造
膝必聞其法語行父事君志存於嫉惡臯陶承弼道遠

于不仁康濟而金柅有倫變調而玉燭無爽謬謬勵大
臣之節端莊清至化之源脩明典章慎選方岳敷我利
澤臻于至平自出鎮漢中既周星律世俗雖歌乎來暮
國人頗詠于去思遂用徵還蓋從公望及延召宣室益
加前籌是宜再涉中樞直脩袞職咨爾良輔其聽朕言
夫天地交泰則時合君臣訢和則國治眷求一德出納
萬幾勉弘如水之心式副濟川之用命官罔及於私昵
詔爵必俟于賢能俾庶績惟凝藝倫攸敘無忝注意敬

之戒之可守中書侍郎平章事

九年四月詔曰寅亮皇猷丹青景化爰從遜衆之舉乃
得非常之才前浙西道都團練觀察處置等使朝議大
夫檢校禮部尚書持節潤州諸軍事兼潤州刺史御史
大夫上柱國姑臧縣開國男食邑三百戶賜紫金魚袋
賈餗識遠韻孤學深行直真和自立介特不羣能操至
公每契中道聲逸羣聽善諧朕心自居京師尤彰望實
亟召便殿屢陳嘉謀罄肝膈以納忠規推誠明而無外

飾察言考事深用得之近命列藩益聞僉論固可以參
我大政陟于中樞天啓予懷賚此良弼爾其守法制平
鈞衡貞玉度以振國經釐百工以凝庶績舉直錯枉當
官而行於戲為君之戒在知賢而不任為臣之患在保
位而不言罔或依違虧吾則哲可中書侍郎平章事

七月詔曰惟昔太宗聰明睿聖克致治平惟魏徵左右
文祖叶建皇極矧朕寡薄思紹丕烈旁求魏徵之比寘
諸巖廊庶裨不逮用底于道御史大夫李固言生于山

東瑞此王國爰在下位早揚直聲介然無朋中立不懼
文經邦俗行表人倫和嶠負棟梁之材辛毗有骨骸之
操便蕃華貴光啓令圖日者徵自近郊延於便殿言多
方格道不容回嘉謀有倫正色無撓朱絃暢疏越之韻
美玉呈特達之姿洎長憲臺彌彰休問固可以斟酌理
本變調化源疇咨僉同夢卜斯協命爾予翼倚為股肱
登于黃樞參我大政爾當一乃心志罄貫忠貞澄清品
流旌別淑慝俾四夷左衽咸寧吾教侯伯卿士各稱厥

官罔曰難理惟其至公罔曰弗能惟其悉力欽哉戒哉
無忝前良可門下侍郎平章事

九月以刑部侍郎舒元與本官平章事以兵部郎中知
制誥翰林學士李訓為禮部侍郎平章事

十一月詔曰朕嗣守丕圖務弘至理憂勤是切宵旰靡
遑所以庶政萬機悉委丞相乃者失于任使妖沴遽生
方思正人叅我大柄銀青光祿大夫守尚書右僕射上
柱國滎陽郡開國公食邑三千戶鄭覃天資直氣嶽降

上才性惟端莊道本孤峻文含風雅學專儒玄通古今
理亂之源達教化損益之要歷踐華貫周旋大僚休問
彰於縉紳故事滿於臺閣載居講度密勿內庭冒襟洞
開肝膈無隱嘗奏讜議發言有先見之明每勵貞觀勇
退守特立之節洎擢膺揆務總領庶官堅操不回墜典
咸舉盡瘁憂國竭忠戴君必能毗予一人康濟四海雅
正之路既別清濁之流自分於戲秉茲鈞衡委乃髦碩
爾其使萬事得其序百官得其人用賢罔不精立法罔

不慎弼亮刑政變和陰陽其聽朕言往踐厥位克紹先

德巖廊有光可本官平章事

初覃為翰林侍講學士每入見必以厚風俗黜朋比

再三為帝言之終以為相

又詔曰朕嗣位君臨精求至道日慎一日

于今十年期輔佐之臣為我致理中立匪懈知無不為
今得其人果副僉屬朝議郎尚書戶部侍郎判度支
上柱國賜紫金魚袋李石操履堅貞志業弘茂性合道
要識通化源屢佐藩方備開勲績用司夕拜之任旋知
尹正之榮爰委財征備宣成效是宜擢膺輔弼俾勵正

能爾當勤成務之規率致君之道內貞百度外靖四方
參毗萬幾課程庶績盡匪懈之節竭宣力之能大振朝
綱兼司國計致億兆之庶富成方夏之乂安副予知臣
勉茂休烈可守本官平章事仍依前判度支

開成二年四月詔曰王者任賢能所以緝熙庶績舉正
直期乎獻可弼違苟非懋茲四德何以光膺大任翰林
學士將仕郎守尚書工部侍郎知制誥兼皇太子侍讀
上騎都尉賜紫金魚袋陳夷行元精降靈厚載儲祉聚

蓄英粹作時休祥懷道清貞執德謙茂行高嵩華弘苞
容之偉量明洞水鏡韜妍媸於默識貞已滋潔遇物能
容雖墻岸孤峻而襟抱夷曠孝友為脩己之具文學職
潤身之餘衆推全才時號端士頃在郎署雅有名稱是
用擢居禁密裨輔導元良論辨見賢人之業教諭得名
臣之體星官屢改才術彌彰古稱旁求於夢卜曷若選
之於言行是用付以政柄登于台階任茲鈞衡之重處
以臯夔之秩人所注意予將仰成勉陳啓沃之術以副

具瞻之望可守本官平章事

三年正月制曰運行帝載翊贊天工必俟輔臣以宣至
化將益秉鈞之重是茲竝命之求諸道鹽鐵轉運等使
正議大夫守戶部尚書上柱國弘農郡開國伯食邑七
百戶賜紫金魚袋楊嗣復動必居正言惟在公峻若孤
山清猶止水從政稟詩書之教承家建禮樂之源朝議
郎守尚書戶部侍郎判戶部事上柱國賜紫金魚袋李
珣質本溫明才推俊茂智能周物弘本能容守和有

君子之儒可大見賢人之業挺為國傑秀稟元精生必
為時寶稱希代便藩清秩操履有嘗調黃鍾而協諧和
朱絃而疏越或總戎重鎮或敷惠字人卒乘有輯時之
功懔發著昭蘇之詠洎入司邦賦爰掌版圖事未成財
公望猶鬱是可以宰領樞務用弼予違叙彝倫而建大
中罄計謀而調元氣又寧華夏保合神人宜申補袞之
規致我垂衣之理於戲孔明相鼎峙之國尚聞魚水之
詞夷吾輔霸業之君猶致鴻翼之喻矧予祗荷丕構雖

未克前修造次之間而不忘遵道宵衣旰食一紀于茲
災沴尚生於旱蝗黎元屢困於衣食中夜靜慮若涉大
川將求津涯俟爾而濟爾謂是靡以拂吾心而不行爾
謂是靡以徇吾志而苟用開物成務俾乂於得時求賢
審官寧我以多士則魚水鴻翼夫何足言勉副簡求無
忝我休命嗣復可守本官平章事依前充諸道鹽鐵轉
運使珏可本官平章事依前判戶部

十二月詔曰緝熙柄政亮采皇猷弘道德而輔昌圖調

陰陽而平景緯我唯求舊人亦與能正位台階實資元
老河東節度觀察處置等使開府儀同三司守司徒兼
中書令大原尹北都留守上柱國晉國公食邑三千戶
實封三百戶裴度星辰稟秀山嶽炳靈文蔚采章量包
江海負經邦之遠畧懷許國之明誠研幾而識洞著龜
運籌而道光竹帛風雨一致儀刑四朝萬方所瞻百辟
為憲洎揚旌鴈塞建節龍山謹管籥而戎塞烟清壯襟
帶而軍牙氣肅虜絕南牧聲雄北門懿茲殊庸予所嘉

歎是用專授衡軸俾清化源統和神人茂育區夏夫宰相之任作予股肱外可以懷柔四夷內可以親附百姓大可以贊亭毒阜生成小可以激貪廉正雅俗爾其休濁予不重言至於玉立巖廊風行號令端若植表為時指南開予胃襟廣我視聽實賴人傑代茲天工爰罷麾幢再操舟楫庶展乞言之禮豈唯論道之尊佇竭訃謀無忝毗倚可守司徒兼中書令

武宗開成五年正月卽位二月制曰朕丕承寶圖思臻

理古小大之政皆依輔臣選衆攸難得人而授中大夫
守太常卿上柱國賜紫金魚袋崔鄆天資正性嶽降瓌
材慎楊震之四知邁臯陶之九德抱負直質秀發英華
動必蹈中言皆體要聚學每探於精蹟馳騁九流摛文
若奏乎笙簧抑揚三代鴻量難挹懿聲自高乃者入典
訓詞出司俊造能用周密靡混妍媸銓總以明允為先
廉察以澄清為重嘗踐其職顯有休功秩宗之選方澄
公台之論彌鬱繇是酌其望實付以鈞衡恢予之規模

廣予之耳目於戲宰相之任弼諧是資予欲使六氣均
調惟爾贊予欲使萬方平又惟爾謨予欲使臣寮得職
惟爾諧予欲使邪正不亂唯爾翼予言罔慮於喞耳汝進
無忘于沃心貞觀開元之法度具存房魏姚宋之規猷
盡在咨爾丞相舉而行之可守本官平章事又以戶部
尚書判度支崔珙守本官平章事

九月以淮南節度檢校左僕射李德裕為吏部尚書平
章事

會昌元年二月以淮南節度使檢校吏部尚書李紳為
中書侍郎平章事

四年六月以淮南節度使檢校司空杜悰為右僕射兼
門下侍郎平章事仍判度支充鹽鐵轉運等使

八月以兵部侍郎翰林學士承旨崔玄為中書侍郎平
章事

五年三月以御史中丞兼兵部侍郎李回守本官平章
事

五月以戶部侍郎崔元式平章事是歲李讓夷平章事

又以兵部尚書鄭肅本官平章事

本紀簡拜
相月不獲

宣宗以會昌六年三月即位四月以兵部侍郎翰林學士承旨白敏中守本官平章事

五月以劔南東川節度使檢校戶部尚書盧商為兵部侍郎平章事

六月以戶部尚書諸道鹽鐵轉運使馬植守本官平章事

大中元年七月以戶部侍郎翰林學士承旨韋琮守本
官平章事

二年三月以禮部尚書諸道鹽鐵使馬植兵部侍郎判
度支周墀竝守本官平章事

十一月以戶部侍郎判度支崔龜從守本官平章事

三年四月以御史大夫崔胤為中書侍郎兵部侍郎判
戶部事魏扶守本官竝平章事

四年十一月以戶部侍郎判本司事魏謩守本官平章

事

六年四月以禮部尚書諸道鹽鐵轉運等使裴休守本
官平章事

七年四月以御史大夫鄭朗為中書侍郎平章事

十一月以戶部侍郎判本司事令狐綯為兵部侍郎平
章事

十一年正月以工部尚書崔慎繇為中書侍郎平章事
六月以兵部侍郎判度支蕭鄴守本官平章事

十二年正月以戶部侍郎判度支劉瑒守本官平章事
五月以兵部侍郎諸道鹽鐵轉運等使夏侯孜守本官
平章事

十三年四月以翰林學士承旨兵部侍郎蔣伸等守本
官平章事

懿宗咸通元年二月以河中節度使杜審權為兵部侍
郎判度支尋守本官平章事以右僕射諸道鹽鐵轉運
等使杜悰平章事

二年九月以前兵部侍郎判度支畢誠為工部侍郎平章事

四年三月以兵部侍郎判度支楊收守本官平章事

十一月以兵部侍郎判度支曹確守本官平章事又以兵部侍郎高瓌守本官平章事

五年十一月以兵部侍郎蕭寘守本官平章事

六年二月以御史大夫徐商為兵部侍郎平章事

七年十一月以翰林學士承旨戶部侍郎路巖為兵部

侍郎平章事

八年三月以兵部侍郎于悰等守本官平章事

十年正月以翰林學士戶部侍郎劉瞻守本官平章事

十一年正月以翰林學士承旨兵部侍郎駙馬都尉韋

保衡守本官平章事

十一月以禮部尚書王鐸守本官平章事

十三年正月以禮部侍郎判度支劉鄴守本官平章事

二月以御史中丞趙隱為戶部侍郎平章事

十四年四月以吏部侍郎蕭倣為兵部侍郎平章事

僖宗乾符元年四月以兵部侍郎諸道鹽鐵轉運等使
崔彥昭守本官平章事

五月以吏部侍郎鄭備為兵部侍郎翰林學士戶部侍
郎盧攜守本官平章事

二年十一月以左僕射王鐸兼門下侍郎平章事

三年二月以太常卿李蔚守本官平章事

五年九月以吏部尚書鄭從謙守本官平章事

六年四月以兵部侍郎崔沆為吏部侍郎戶部侍郎翰林學士豆盧瑑守本官竝平章事

十二月以太子賓客分司盧攜為兵部侍郎平章事

廣明元年十一月以戶部侍郎翰林學士王徽裴徹竝守本官平章事

中和元年正月車駕在興元以翰林學士承旨尚書戶部侍郎

郎蕭遘為兵部侍郎平章事

三月車駕在成都以鳳翔節度使鄭畋為司空兼門下侍郎

平章事

七月以兵部侍郎判度支韋昭守本官平章事

四年四月以兵部侍郎判度支鄭昌圖守本官平章事

光啓二年三月以翰林學士承旨工部尚書杜讓能為

刑部尚書御史大夫孔緯為兵部侍郎竝平章事

三年正月以兵部侍郎諸道租庸使張濬守本官平章事

昭宗龍紀元年正月以翰林學士承旨兵部侍郎劉崇

望守本官平章事

大順元年十二月以翰林學士承旨兵部侍郎崔昭緯
守本官御史中丞徐彥昭為戶部侍郎竝平章事

二年十二月以戶部尚書鄭延昌為中書侍郎平章事
判度支

景福二年十一月以新除鳳翔節度使徐彥若復知政
事戶部侍郎判戶部事王搏本官平章事

乾寧元年十月以翰林學士承旨禮部尚書李璣為中

書侍郎平章事

宣制之日兵部郎中知制誥劉重魯出班而泣言竊恐邪黨附內府省不可居

輔弼之地繇

是制命不行

是月以御史中丞崔商為兵部侍郎平章事

二年六月以太子賓客孔緯為吏部尚書尋加守司空門下侍郎平章事緯時在華州屬太原李克用軍至而止以湖廣節度使王搏為中書侍郎平章事

三年七月翰林學士承旨尚書左丞陸扆為戶部侍郎平章事

八月新除鎮東軍節度使王搏復知政事以京兆尹孫
偓為兵部侍郎平章事

四年二月以右散騎常侍鄭祭為禮部侍郎平章事

五月以國子毛詩博士朱朴為右諫議大夫平章事

光化元年正月

車駕在華州

以兵部侍郎崔遠為戶部侍郎

平章事

二年正月以兵部尚書陸辰為兵部侍郎平章事

三年九月以刑部尚書裴贄為中書侍郎兼刑部尚書

以吏部侍郎裴樞為中書侍郎竝平章事

天復二年十二月以禮部侍郎獨孤損為兵部侍郎平章事

三年正月車駕自鳳翔還京工部尚書崔裔率百官迎謁即日降制以裔為守司徒兼門下侍郎平章事

二月以新除廣南節度使裴樞為門下侍郎兼吏部尚書以戶部侍郎王搏守本官竝平章事

十二月以禮部尚書獨孤損為中書侍郎平章事

天祐元年正月以翰林學士左拾遺柳璨為右諫議大夫以兵部尚書崔遠為中書侍郎竝平章事

哀帝即位踰年不改元仍號天祐二年二月以吏部侍郎張文蔚尚書左丞楊涉竝為中書侍郎平章事

後唐莊宗同光元年四月即位于魏是月以行臺左丞相豆盧革為門下侍郎平章事太清宮使以行臺右丞相盧程為中書侍郎平章事修國史

時帝將行冊禮簡求輔相詢于盧質

對曰若以本朝士族取人則無踰定州節度判官豆盧革河東觀察判官盧程帝因詔赴行臺為右丞相至是

改為行
臺之命

十一月以尚書左丞趙光裔為中書侍郎以尚書禮部

侍郎韋說守本官竝平章事

時盧程以狂妄免郭崇韜自勲臣拜議者以為國朝

典禮故實須訪前代名家成法光裔有宰相器初薛廷珪李琪當武皇為晉王時常因為冊使至太原故皆有夙望咸謂宜處台司崇韜採言事者陸廷珪朽老浮華無相業琪雖文學高傾險無士風皆不可相乃用光裔與韋說

同制

明宗天成元年五月制曰欲運陰陽賢者諒資於籌畫

將烹鼎飪哲王取喻于鹽梅是知心恬淡則變理無差

意平正則調和靡隱王者以二儀為法百度是貞將施
理國之規必慎代天之任其有鎮時望重濟物才高或
早推房杜之風或暗合孫吳之略咸膺妙選適副旁求
光祿大夫太子賓客上柱國滎陽郡開國侯食邑一千
戶鄭珽禮樂成家鈞台接武珪璧耀無瑕之彩咸韶奏
治代之音雅度不羣貞規拔俗為縉紳之楷範作文學
之宗師厯踐華資嘗居重任舒卷罔渝于古道坦夷不
易于冲襟允謂正人實符休運正議大夫守工部尚書

上柱國樂安縣開國男食邑三百戶賜紫金魚袋任圜
儒玄繼代簪組傳芳蘊穰苴文武之才抱李子縱橫之
略早叅戎幕既備展於良謀洎厯尹京復廣敷于善政
掩李牧防虞之術繼蕭何饋運之勞安北邊而顯賴殊
功代西蜀而固資婉畫及康延孝忽從劔閣欲襲錦川
統戎至及于三千破賊將踰于萬數奸兇盡戮邛蜀再
寧靜十道之妖氛息三川之生聚遠提銳旅來赴上京
適當纂紹之初尤驗忠貞之節而鬱于人望協彼僉諧

宜膺竝命之榮允謂當仁之選或升書殿或掌國租糶
伸致主之嘉猷別展富民之茂績於戲位尊百辟職總
萬幾公忠則庶政惟和便辟則彝倫攸斁慎宣九德勉
阜羣生珏可中書侍郎兼刑部尚書平章事集賢殿大
學士園可金紫光祿大夫中書侍郎兼工部尚書平章
事判三司時帝初即位園自蜀至安重誨不欲獨拜率
輔共議朝望一人共之孔循言珏貞明時久
在中書性畏慎而長者美詞翰好
人物重誨即奏與園竝命為相

二年正月制曰昔舜命皋夔百揆時敘湯命仲虺萬國

咸寧道既合于君臣事實光于今古朕克相上帝敷佑
下民惟順考于典墳俾旁求于彥傑升之廊廟付以鈞
衡期共治于寰區冀永康於黎庶厥有明哲咸謂碩儒
早隆佐命之功久負濟時之器必使膺茲大任弼我丕
基既詢謀以僉同固朕志而先定爰行竝命是降寵靈
端明殿學士朝議大夫守尚書兵部侍郎上柱國賜紫
金魚袋馮道四瀆凝休五行鍾秀積善克承于家訓揚
名端守于素風孔門魯顏寧同懿行漢庭嚴樂詎比宏

才溫恭為君子之儒，慤厚有大臣之體。故自從龍契會，倚馬搗詞，首贊先朝紹隆丕業。為善不伐，有能不矜。守廉貧則罔恥，緼袍持慎。審則靡言，溫樹自予纂嗣。賴爾弼違，爰精選于禁林。乃特遷于秘殿，愈陳規誠。屢罄論思，都正直以莫倫。諒真純而罕匹，銀青光祿大夫守太常卿判吏部尚書銓事上柱國崔協，星辰降彩，軒冕聯榮。禮樂稟于生知，詩書博于時習。輝華繼世，可鄙荀陳。清貴傳家，固超王謝。自登高第，踐歷周行。居省闈則職

業備脩升憲府則朝綱克振近者委司選部命典秩宗
轄彼銓衡則羣才適序調其律呂則雅音克諧既揚正
始之風可驗中和之德竝以功庸夙著問望彌高宜允
副于具瞻俾顯當于爰立是命寵升黃閣光弼紫宸或
居書殿之榮俱列戶封之貴仍加峻級以示新恩道既
叶于咨詢心乃符于啓沃於戲知人則哲予竊慕于前
王事君盡忠爾已聞於當代更宜夙夜慎保初終使社
稷以無憂期子孫之有賴往踐厥位汝惟戒哉道可正

議大夫中書侍郎平章事充集賢殿學士協可中書侍

郎平章事

初豆盧革章說得罪執政相與議宰相時經始之初言事者衆咸以孔循少侍宮禁諳故

實知朝廷人士之才行安重誨多聽之循意不欲河朔人居相位初已援引鄭珣入中書至是任園欲相李琪而鄭珣與琪梁時同在翰林為學士二人不相善故琪切齒孔循既以珣為門人亦排斥李琪謂重誨曰李琪非無藝學但不廉耳宰相人士之表儀但得真端有罷度足以輔弼矣朝論所與莫若崔協重誨以為然後重誨內殿中書闕人欲擇丞相而帝曰誰可相者乃以崔協對任園曰重誨未諳朝中人物被人欺賣如崔協者天下皆知少識文字時人呼為無字碑臣以陛下藩邸之年即回天睠無才幸進比不知書一旦驟膺輔弼終朝若負芒刺以臣一人取笑足矣何容中書之內更益笑端帝曰宰相重位卿等更自詳審然吾在藩時識易

州刺史韋肅人言名家待我常厚置于此位如何以肅
苟未可則馮書記先朝判官稱為長者多才博學與物
無競可以相矣書記即馮道也嘗為莊宗霸府書記帝
素款頗偶不記名但云書記朝退宰臣樞密使休于中
興殿廊舍孔循不揖拂衣徑去曰天下事一則任園園
乃何人崔協暴死則已不死會居此位重誨私謂園曰
今正闕人協宜備員可乎園公言何狹哉今朝廷有李
琪者學際天人奕葉軒冕論才校藝可敵時輩百人而
讒夫巧辨忌害其能必舍琪而相協何棄蘇合之丸取
蝓蟻之轉也重誨笑而止然與循同職循曰言琪之短
知協之長月餘乃
下此制物論醜之

三年三月癸亥以成德軍節度使王建立為檢校太尉
尚書右僕射同中書門下平章事充集賢殿大學士判

三司事

長興二年三月制曰衡之平不欺于物水之止洞鑑于形厥有操心秤而無撓重輕掛人鏡而自分妍醜所以旁求多士果得正人符夢卜而惟吉之從舉賢良而不仁者遠命為余弼僉曰汝諧朝議大夫守太常卿上柱國隴西縣開國男食邑三百戶賜紫金魚袋李愚勁草凌風孤松抱雪向歷艱難之運再逢開泰之期先皇帝擢在禁林輟隨征旆鋒鉞翰墨經劔閣而無競刊銘糞

土珠金入刀州而未嘗關夢罔矜諭蜀素蘊致堯洎朕
纘紹丕圖服勤內署慎密而不言溫樹論思而守奉甘
泉及掌文闈大開公道樹杏壇而重興四教歷蘭省而
再陟二卿當祀周郊密承殷誥泥金而將期獻頌擊石
而尋致來儀既歷試諸艱且爰立作相是命亞鳳池之
貴位領虎殿之羣儒仍進崇階兼加好爵於戲久虛右
席俾運前籌期偃戢於干戈致混同于書軌以毗乃辟
正事惟醇則霖雨鹽梅于是乎在可正議大夫守中書

侍郎平章事集賢殿大學士

四年正月制曰端明殿學士正議大夫尚書兵部侍郎
柱國彭城縣開國男食邑三百戶賜紫金魚袋劉昫可
中書侍郎平章事

四月制曰朕聞燮理陰陽霖雨之功是託調和鼎鼐鹽
梅之味攸憑蓋貞淳則克契二儀正直則允諧庶品必
在懸衡秉志定鏡操心苟無爽于毫釐則潛符于造化
將付代天之柄宜歸不世之才今得良臣庶臻治道端

明殿學士中大夫尚書兵部侍郎上柱國賜紫金魚袋
趙鳳丹山瑞彩赤厓靈鋒清明猶水鏡冰壺質厚若渾
金璞玉動惟稽古靜可鎮時夢傳五色之毫文章煥爛
力就三冬之志學藝縱橫頃在禁林嘗傳職業始中原
之大定屬萬國以來朝制命聯綿詔書疊委共歎立成
之敏略無停綴之時洎朕承基復資演誥俄遷居于祕
殿嘗密贊于鴻圖實賴謀猷每嘉經濟爰司貢部俾選
儒徒果無遺逸之名足見搜羅之道昨朕將還雒邑特

委浚郊一時權藉于殿邦朞月尋聞于報政恩威竝設
賞罰皆明夷門無夜柝之喧梁苑遂春臺之樂克膺重
寄允謂周才宜顯處于巖廊貴大施于陶冶黃扉峻秩
粉署崇資兼煩筆削之功更代簡編之職勲階竝進爵
邑維新足為爰立之榮在體勤求之意唯思啓沃端俟
弼諧於戲應卜夢之祥當股肱之任關羣生之休戚繫
萬宇之安危社稷是平寰瀛繫賴勉勤夙夜無怠初終
勿令伊說臯夔咸擅美于前也可正議大夫門下侍郎

兼工部尚書同平章事監修國史上柱國仍封天水縣
開國男食邑三百戶

末帝清泰元年七月以檢校戶部尚書守太常卿盧文

紀為中書侍郎平章事

帝素不悅馮道以奉山陵出鎮
而用李琪劉昫則大察而寡

合琪則氣剛而性褊每于議論動必相違所以恩澤稽
留庶事停壅帝頗患之切擇輔臣採之于人又疑而未
決乃書作相姓名置琉璃器中一夜燃香祝
星辰清早以箸夾之首得文紀名故命之

八月以尚書左丞姚顛為中書侍郎平章事

十二月以秦州節度使張延朗為中書侍郎平章事

三年三月以翰林學士禮部侍郎馬胤孫為中書侍郎

平章事

初帝為潞王鎮河中時胤孫為記室留守西京節度鳳翔累轉觀察判官及即位用為翰林學

士戶部郎中知制誥賜紫金魚未滿歲改中書舍人禮部侍郎皆帶禁職時藩邨舊臣韓昭胤房嵩為樞密使劉延節李專美為宣徽使河南尹雍王重美不平之密奏曰馬胤孫者只令視草恐未得宜帝然之尋拜中書侍郎平章事

晉高祖天福元年閏十一月制曰天有寶圖應運者文明之主國調金鉉入司者經緯之臣將與大同須資良弼况謂建邦之始難虛納揆之官其有霸府舊僚前籌

上密歷歲寒而斯久弘益嘗多經艱險而不渝忠貞彌篤式旌懿德宜舉徽章乃擇吉辰爰行竝命翰林學士承旨知河東軍府事正議大夫尚書戶部侍郎知制誥賜紫金魚袋趙瑩儒中端士席上正人襟靈而萬里坦夷行葉而四時繁茂洎陞簪履旦夕之婉畫喧人每侍籌帷遐邇之折衝在我翰林學士權知樞密使事正議大夫尚書禮部侍郎知制誥賜紫金魚袋桑維翰文塲翹楚學海波瀾撓澄不變于二風躁靜同歸于一德誠

抱兼人之器諒懷經國之才十年伸揮翰之勞數鎮有
從征之役而皆功參佐命績顯坐籌蕭曹遠接于英猷
房杜近齊於芳烈成予丕業職爾元勳既協良辰難稽
懋賞自董戎而居廊廟繇內翰而秉鈞衡乃用器能行
觀變贊於戲優賢異典有國新恩勉伸裨救之謀共致
升平之治事繁罔避言直勿辭永修魚水之觀以保雲
龍之契瑩可金紫光祿大夫門下侍郎平章事集賢殿
大學士依前權知樞密使事

十二月制曰舜任五臣坐致穆清之化漢尊三傑克成
王霸之基皆所以君臣義通上下情洽得以寅亮大化
導揚休聲百工允釐垂衣裳而御宇萬方率服鑄劍戟
以為農式繇輔弼之功兆此隆平之運朕謬膺開創初
統寰瀛炤臨將被於淳風宰制實憑於良輔其有功宣
締構業紹經綸兩朝翰翮戴之勲萬彙仰陶鈞之力是
宜重膺夢卜再踐廟堂俾光新造之邦共闡無為之化
經邦致理翊戴功臣特進守司空上柱國始平郡公食

邑二千五百戶食實封三百戶馮道禮天蒼璧鎮國元
龜夏璜為稀世之珍軒鏡是辟邪之寶方諸才業良平
有可差其肩較彼忠貞姚宋不得竝其轡可謂人臣之
刀尺造化之丹青自明宗皇帝克紹基扃仰膺圖讖於
草昧皇靈之際有攀鱗附翼之功密贊皇猷靜司帝誥
出納奉命周旋八年持葛秤以定錙銖浮殷舟而極沉
溺四時成歲陰陽畢順於調燮九德不愆朝野咸推於
表式繫於薄德獲彼寵靈將惕勵以為懷恐負荷之弗

克宜憑勲德共濟艱難是用重啓巖廊俾持埏埴水土
之崇資不改弘文之大柄仍兼於戲造膝陳謀爾無辭
於裨救開懷納諫朕不急於聽從致社稷於昌期納生
靈於壽域共臻至理勿墜前功唯于大臣不俟多訓可
守司空兼門下侍郎平章事弘文館大學士

三年正月以兵部侍郎判戶部李崧為中書侍郎平章
事充樞密使

五年八月以翰林學士承旨戶部侍郎和凝為中書侍

郎平章事

漢高祖以開運四年二月即位稱天福十三年四月以河東節度判官蘇逢吉觀察判官蘇禹珪竝為中書侍郎平章事

九月以吏部尚書竇貞固為司空兼門下侍郎平章事弘文館大學士以翰林學士行中書舍人李燾為中書

侍郎兼戶部尚書平章事

高祖有相燾意燾未拜前一日欲言事請見高祖召與語

燾曰國家新造丕圖內外藩輔並宜得人苟非其人無益招患今相輔位缺未審陛下欲命何人高祖曰竇貞

固問其次曰李燾燾恐悚謝曰臣罷狹性忠憂時過當
輒有僭越數奏然臣才薄地卑無輔弼之望幸勿以臣
汚制書翌日制
出拜平章事

周太祖廣順元年正月即位以前太師齊國公馮道為

中書令弘文館大學士

六月以樞密使王琚為左僕射兼門下侍郎平章事監
脩國史充樞密使以樞密副使兵部侍郎范質為中書
侍郎平章事以戶部侍郎判三司李谷為中書侍郎平

章事判三司

顯德元年正月制曰鴻遇順風比事者美良賢之任鵬
征積水寓言者伸遠大之圖位非才而不居才非位而
不展兩端相叩庶績方凝爰升佐命之臣以授調元之
職端明殿學士通議大夫尚書戶部侍郎上柱國太原
縣開國男食邑三百戶賜紫金魚袋王溥智出於衆行
高於人茂學懿文而策名長才廣度以成器始歸霸府
當效折衝洎翊造邦尋參宥密擢禁林之詞翰伸祕殿
之論思履順持謙奉公處正紫宸三接在注意以方深

黃閣九遷諒登庸而允協俾宣相業共贊皇猷食邑贈封功臣改號仍進階資之貴俱為輔弼之光爾其師克儉於焚機繼在公於補袞止辭而出奉義而行將聯廢載之歌長保虔恭之位佩服茲訓式昭德音可紫金光祿大夫中書侍郎平章事

世宗以是月丙申即位七月癸巳制曰朕自履宸極思平泰階出一令慮下民之未從行一事懼上玄之罔祐晨興夕惕終歲于茲雖禮讓漸聞興行而風雨未之咸

若豈刑政之斯闕而德教之未敷哉。繇是進用良臣，輔
宣元化。雖朕志先定，亦輿情具瞻。爰擇嘉辰，誕敷明命。
樞密院直學士中大夫尚書工部侍郎上柱國晉陽縣
開國男食邑三百戶賜紫金魚袋景範。昔佐先帝，每罄
嘉謨。建事眇躬，愈傾忠節。奉上得大臣之體，檢身為君
子之儒。一昨戎輅親征，皇都是守。贊勳賢於留府，副徵
發於行營。軍政所資，國用無闕。今則靈臺偃革，宣室圖
功。思先朝欲用之言，成聖考得賢之美。俾參大政，仍掌

利權爾其明聽朕言往敷玄化予欲則垂象而清品彙
爾則順天道以序彝倫余欲恤刑名而息戰爭爾則謹
憲章而恢廟畧天人之際懸合軍民之事罔渝則國相
之尊非爾孰處邦計之重惟才是藏勉思個儻以致君
勿效因循而保位佇聞成績用副虛懷可正議大夫中
書侍郎平章事判三司

冊府元龜卷七十四